

**Uunga siunnersuut: Pisortat Pisiortortarneranni Neqerooruteqartitsinermi
Maalaaruteqartarfik pillugu Inatsisartut inatsisaat nr. xx, xx. xxx 2018-imeersoq**

Atuuffissaa

§ 1. Pisortat Pisiortortarneranni Neqerooruteqartitsinermi Maalaaruteqartarfik pisortani oqartussat aamma sullissiviit nioqqutissanik aamma kiffartuussissutinik pisiniarnerannut atatillugu neqerooruteqartitsisarneq pillugu Inatsisartut inatsisaanni (neqeroortitsisarnermut inatsit) aalajangersakkanik unioqqutitsineq pillugu naammagittaalliutinik suliaqassaaq.

Imm. 2. Inatsisartut inatsisaanni imaluunniit Inatsisartut inatsisaat naapertorlugu Pisortat Pisiortortarneranni Neqerooruteqartitsinermi Maalaaruteqartarfimmut naammagittaalliorsinnaaneq pillugu aalajangersakkanik aalajangersaasoqarsimappat, inatsit aammattaaq atuutissaaq.

*Pisortat Pisiortortarneranni Neqerooruteqartitsinermi Maalaaruteqartarfiup
aaqqissuussaana*

§ 2. Pisortat Pisiortortarneranni Neqerooruteqartitsinermi Maalaaruteqartarfiup inuttarissavai siulittaasoq ilaasortallu sulianik ilisimasallit ikinnerpaamik marluk.

Imm. 2. Siulittaasoq aamma ilaasortat ukiut sisamat tikillugit atuuttussatut toqqarneqassapput.

Imm. 3. Ilaasortat tamarmik immikkut sinniisussaannik 1-imik amerlanerusunilluunniit ilaasortaasup pisinnaanginnerani peqataasussamik toqqaasoqassaaq.

Imm. 4. Siulittaasoq, inatsisilerituutut soraarummeersimasoq, Kalaallit Nunaanni Eqqartuussisuunermi toqqarneqassaaq. Ilaasortat sulianik ilisimasallit Kalaallit Nunaanni pisortani suliaqartuusut inuussutissarsiornermilu attuumassutilinnit, inuit pisortat pisiortortarnerannik imaluunniit inatsisilerinermik ilisimasallit akornanni innersuussinerit naapertorlugit Naalakkersuisunit toqqarneqassapput.

Imm. 5. Siulittaasoq aamma ilaasortat sulianik ilisimasallit naammagittaalliuteqartarfimmi sulinerminni arlaannaannulluunniit attuumassuteqanngitsumik atuutissapput.

Imm. 6. Siulittaasoq ilaasortallu sulianik ilisimasallit toqqaqqinneqarsinnaapput.

Imm. 7. Inatsisartunut Naalakkersuisunullu il.il. ilaasortat aningaasarsiaqartitaanerit il.il. pillugit Inatsisartut inatsisaat naapertorlugu maalaaruteqartarfiup ilaasortaasa aningaasarsiaqartinneqarnissaat pillugu Naalakkersuisut malittarisassaliussapput.

§ 3. Pisortat Pisiortortarneranni Neqerooruteqartitsinermi Maalaaruteqartarfik allattoqarfeqarpoq, maalaaruteqartarfiup suliaqarnerani ikiuuttussamik.

Imm. 2. Inatsisartut inatsisaanni matumani aalajangersakkat eqqarsaatigalugit maalaaruteqartarfiup suleriaasissai siulittaasup aalajangersassavai.

Naammagittaalliuuteqarsinnaatitaasut

§ 4. Pisortat Pisiortortarneranni Neqerooruteqartitsinermi Maalaaruteqartarfimmut naammagittaalliuuteqarsinnaasut tassaapput:

- 1) Kinaluunniit inatsisit tunngavigalugit annertuumik tamatumunnga soqutiginnittoq.
- 2) Kattuffiit aamma pisortani oqartussat Naalakkersuisunit naammagittaalliorsinnaatinneqartut.

Imm. 2. Maalaaruteqartarfiup inuk alla suliamut annertuumik pingaaruteqartoq naammagittaalliuuteqarfigineqartoq naammagittaalliorluunniit sinnerlugit suliamut peqataatinneqarnissaa akuerisinnaavaa.

Naammagittaalliummik tunniussineq

§ 5. Naammagittaalliuut suliamut tunngatillugu ilanngussartalik suliakkiuteqartup naammagittaalliuutaata inerniliiffigineqarnerata aalajangiiffigineqarnerataluunniit kingorna kingusinnerpaamik sapaatit akunneri sisamat qaangiutsinnagit allaganngorlugu Pisortat Pisiortortarneranni Neqerooruteqartitsinermi Maalaaruteqartarfimmut tunniunneqassaaq.

Imm. 2. Naammagittaalliuutip maalaaruteqartarfimmut tunniunneqarneranut peqatigitillugu naammagittaalliuuteqartup suliakkiissutini pillugu naammagittaalliuuteqarfigineqartumut allaganngorlugu nalunaarutigissavaa. Naammagittaalliuut naammagittaalliuuteqartup naammagittaalliuuteqarfigineqartumut nalunaarutaata assilineranik ilaqartinneqassaaq.

Imm. 3. Naammagittaalliuutigineqartoq suliassap suliarineqarnissaanut tunngavissiingippat maalaaruteqartarfiup aalajangiinermigut naammagittaalliuut itigartissinnaavaa, tamanna naammagittaalliuuteqartumut naammagittaalliuuteqarfigineqartumullu nalunaarutigineqassaaq.

Imm. 4. Imm. 3 malillugu naammagittaalliuut itigartitsissutigineqarpat, imm. 5 malillugu naammagittaalliuuteqarnermut akitsuut akiliutigineqartoq utertinneqassaaq.

Imm. 5. Pisortat oqartussaaffigisaanni suliffeqarfiinilu nioqqutissanik kiffartuussinernillu pisinermut tunngatillugu neqerooruteqartitsisarneq pillugu Inatsisartut inatsisaat naapertorlugu naammagittaalliummik tunniussinermi naammagittaalliuuteqartoq naammagittaalliuuteqarnermut akitsuummik kr. 10.000-inik akiliuteqassaaq.

Imm. 6. Naammagittaalliuuteqarnermut akitsuut akiliutissaq akilerneqartinnagu maalaaruteqartarfiup naammagittaalliuut suliaralugu aallartissanngilaa. Naammagittaalliuutip tunniunneqarneranit kingusinnerpaamik sapaatip akunneri sisamat qaangiuppata naammagittaalliuuteqarnermut akitsuut akilerneqarsimangippat naammagittaalliuut atorunnaartutut isigineqassaaq.

Imm. 7. Naammagittaalliortoq naammagittaalliuutigisamini tamakkiisumik ilaannaasumilluunniit taperserreqarpat, § 5, imm. 5 malillugu naammagittaalliuuteqarnermut akiliutigineqartoq utertinneqassanersoq pillugu Naalakkersuisut maleruagassanik erseqqinnerusunik aalajangersaasinnaapput.

Suliassap piareersarnejarnera

§ 6. Pisortat Pisiortortarneranni Neqerooruteqartitsinermi Maalaaruteqartarfiup naammagittaalliuuteqarfigineqartoq qinnuigissavaa suliame pisut inatsisitigullu pissutsit pillugit nassuiaammik tunniusseqqullugu kiisalu naammagittaalliuuteqartarfiup piffissaliussaa nallertinnagu suliame tunngatillugu uppersaatinik nassiusseqqullugu.

Imm. 2. Maalaaruteqartarfiup § 4, imm. 2 naapertorlugu naammagittaalliuuteqartoq, naammagittaalliuuteqarfigineqartoq inulluunniit alla qinnuigisinnavaai paasissutissanik suliap naliliiffigineqarnissaanut pisariaqartutut naliliiffigineqartunik maalaaruteqartarfiup piffissaliussaa nallertinnagu pissarseqqullugit.

§ 7. Naammagittaalliuuteqartoq suliame peqataatinneqalersimasoq, taamaattoqarpat, nassuiaammik § 6, imm. 1-imi taaneqartumik allagaatinillu suliame tunngasunik maalaaruteqartarfiup ilisimatinneqassapput, tassa tunniussineq inatsisinut allanut akerliunnigippat.

Imm. 2. Siulittaasup sulianut ataasiakkaanut tunngatillugu aalajangersinnaavaa allaganngorlugu ilanngussanik allanik paarlaasseqatigiittoqassasoq.

§ 8. Suliassaq allaganngorlugu ilanngussanik paarlaasseqatigiinnikkut piareersarnejassaaq tamannalu tunngavigalugu aalajangiiffigineqarluni, tassa oqaasiinnartigut isumaqatiginninni-artoqarnissaa siulittaasup aalajangersimannigipagu.

Imm. 2. Naammagittaalliuuteqartoq, naammagittaalliuuteqarfigineqartoq suliame peqataatinneqalersoq eqqartuussissuserisumik, kukkunersiuisumik allamilluunniit suliame tunngatillugu ilisimasalimmik sinniisoqarnissanut pinnaatitaavoq. Siulittaasup kaammattuutigisinnavaa naammagittaalliuuteqartoq naammagittaalliuuteqarfigineqartoq suliame peqataatinneqalersoq naammagittaalliuuteqartup siuliani allassimasutut sinniisoqarnissaa.

Imm. 3. Oqaasiinnartigut isumaqatiginninniarnert tamanut ammasuunnigillat. Pissutsilli immikkut ittut atuutsillugit siulittaasup aalajangersinnaavaa tamanut ammatitsinissaq.

Suliap aalajangiiffigineqarnera aamma suliame aningaasartuutit

§ 9. Pisortat Pisiortortarneranni Neqerooruteqartitsinermi Maalaaruteqartarfiup illuatungeriinni aappaasoq tapersersornerusinnaangilaa pineqartup piumasaqaatai sipporlugit aamma illuatungeriinni pineqartup pissutsit atuutsinnianngisai eqqarsaatigissanagit.

§ 10. Pisortat Pisiortortarneranni Neqerooruteqartitsinermi Maalaaruteqartarfimmi sulianik aalajangiinermi siulittaasoq ikinnerpaamillu ilaasortat paasisimasallit 2 peqataassapput. Maalaaruteqartarfimmi aalajangigassat nalinginnaasumik amerlanerussuteqartoqarneratigut aalajangiiffigineqartassapput. Taasisut nalogiippata siulittaasup taasinera aalajangiisuusaaq.

Imm. 2. Siulittaasup ilaasortanik sulianik ilisimasalinnik peqataasoqanngikkaluortoq suliani periaatsimut tunngaviunngitsumik pissuseqartuni aamma suliat ingerlaneranut tunngasut aalajangiiffigisinnaavai.

Imm. 3. Aalajangiineq tunngavilersorneqassaaq aamma naammagittaalliuuteqartumut, naammagittaalliuuteqarfigineqartumut suliamullu peqataatinneqalersimasumut nassiunneqarluni. Aalajangiineq isumaqatigiilluni pisimanngippat aalajangiineq isummernermit aalajangiinermut tunngavissiiingitsumik imaqassaaq.

Imm. 4. Maalaaruteqartarfiup aalajangersinnaavaa naammagittaalliuuteqartup suliamut aningaasartuutai tamakkiisumik ilaannakortumilluunniit illuatungeriinni ajorsartup akilissagai, taamaattoq tak. imm. 5 aamma 6.

Imm. 5. Imm. 4 malillugu suliamut aningaasartuutit annerpaamik 75.000 kr.-ussapput, taamaattoq tak. imm. 6.

Imm. 6. Maalaaruteqartarfiup naammagittaalliuuteqartup suliamut aningaasartuutaanik naammagittaalliuuteqarfigineqartoq akileeqqussappagu maalaaruteqartarfiup pissutsit immikkut ittut pissutissaqartippassuk imm. 5-imi aningaasat annertunerpaaffissaat avaqqussinnaavai.

§ 11. Pisortat Pisiortortarneranni Neqerooruteqartitsinermi Maalaaruteqartarfimmit aalajangiussinerit maalaaruteqartarfiup nittartagaatigut tamanut saqqummiunneqassapput.

Imm. 2. Maalaaruteqartarfiup ukiumoortumik nalunaarutaa aalajangikkanik imalik ukiut tamaasa maalaaruteqartarfiup nittartagaatigut saqqummiunneqassapput.

Iliuuseqarnissamut kinguneqartitsinissamullu periarfissat

§ 12. Pissutsit immikkut ittut pissutissaqartippassuk Pisortat Pisiortortarneranni Neqerooruteqartitsinermi Maalaaruteqartarfiup piumasaqaateqartoqarneratigut naammagittaalliuutip suliarinissaa atuuttussaatisinnaavaa.

Imm. 2. Maalaaruteqartarfiup naammagittaalliuutip suliarineqarnissaa taamaallaat atuuttussaatisinnaavaa:

- 1) naammagittaalliuuteqartup suliame taperserineqarnissani ilimagippagu,
- 2) naammagittaalliuuteqartoq naammagittaalliumminik atuuttussaatisinnaannginnera pissutigalugu soqutigisaminik allatut isumaginninnissamut periarfissaqanngippat, aamma
- 3) neqerooruteqartup neqeroorummi naammassineqarnissaanik soqutiginninnerata aamma naammagittaalliuuteqartup suliap atuuttussaatinneqarnissaanik soqutiginninnerata suliassap kinguartinneqarneranik kinguneqarnerata imminnut naapertuutsissinnaanerannik nalilersuilluartaqarsimappat.

§ 13. Naammagittaalliuuteqarfigineqartup suliariumannittussarsiuussisarnermut inatsimmi malittarisassat unioqqutissimappagit Pisortat Pisiortortarneranni Neqerooruteqartitsinermi Maalaaruteqartarfiup:

- 1) Naammagittaalliuuteqarfigineqartup neqerooruteqarnerminut atatillugu neqeroornermini suleriaasia imaluunniit aalajangigai tunuartissinnaavai.
- 2) Naammagittaalliuuteqarfigineqartup unioqqutitsilluni aalajangigai imaluunniit neqeroorutai atorunnaarsinnaavai.
- 3) Neqerooruteqarnermut atatillugu neqerooruteqarnermi suleriaaseq imaluunniit aalajangiinerit inerteqqutaajunnaarnissaat peqqussutigisinnaavaa.

§ 14. Naammagittaalliuuteqartup piumasaqarneratigut Pisortat Pisiortortarneranni Neqerooruteqartitsinermi Maalaaruteqartarfiup naammagittaalliuuteqarfigineqartoq peqqusinnaavaa suliariumannittussarsiuussisarnermut inatsimmik imaluunniit neqeroortitsisarnermut inatsimmik unioqqutitsisimanerup malitsigisaanik naammagittaalliuuteqartup annaasaanut taarseeqqullugu.

§ 15. Akileeqqusisoqarsinnaavoq inunnut:

- 1) Piaaraluni mianersuaalliorujussuarluniluunniit eqqunngitsumik imaluunniit salloqittaalluni maalaaruteqartarfimmut paasissutissiisunut, tak. § 6.
- 2) Maalaaruteqartarfiup inerteqqutaanik imaluunniit peqqussutaanik malinninngitsunut, tak. §§ 12-13.

Imm. 2. Inatsisartut inatsisaanni imaluunniit peqqussutini Inatsisartut inatsisaat naapertorlugu peqqusissutigineqartuni akileeqqusissuteqarnissamik aalajangersaanissaq inatsimmi tunngavissaqartillugu, akileeqqusissuteqarneq Kalaallit Nunaanni pinerluttulerinerimut inatsisit malillugit inummut pisinnaatitaasumut pisussaataasumullu pisussaaffiliunneqarsinnaavoq.

Imm. 3. Akileeqqusissutit, imm. 1 aamma 2 naapertorlugit pisussaaffiliunneqartut, Nunap karsianut tutsinneqassapput.

Eqqartuussivinnut il. il. suliassanngortitsineq

§ 16. Pisortat Pisiortortarneranni Neqerooruteqartitsinermi Maalaaruteqartarfiup aalajangiiffigisaa illuatungeriinnut nalunaarutigineqareernerata kingorna kingusinnerpaamik sapaatit akunneri arfineq pingasut qaangiunneranni eqqartuussivinnut suliassanngortinneqarsinnaavoq. Piffissaliusseq tamanna nallertinnagu suliassanngortitsisoqanngippat aalajangiineq inaarutaasumik aalajangiinerussaaq.

Imm. 2. Maalaaruteqartarfiup aalajangiinera allaffissornikkut oqartussamut allamut suliassanngortinneqarsinnaangilaq.

Atuutilerpera il.il.

§ 17. Inatsisartut inatsisaat ulloq 1. januar 2019 atuutilerpoq.

Imm. 2. Inatsisartut inatsisaat neqerooruteqarnernut pilersuisumik ulloq 1. januar 2019 kingornaluunniit isumaqatigiissutigineqartunut atuutissaaq.

Namminersorlutik Oqartussat, ulloq xx. xxx 2018

Kim Kielsen